

趙恭毅公自治官書類集

趙恭毅公行述卷之二十四

長沙何祖柱附梓

皇清誥授資政大夫戶部尚書兼管錢法堂事務前都

察院左都御史謚恭毅松伍府君暨

誥贈夫人龔太夫人行述

嗚呼天乎天之待府君者素厚何至今日而忍施

慘酷乎縱

不孝兄弟

螻蟻微軀不足以代父之命

獨不可以一家子姓合減數十年之算爲府君少

假數年俾

不孝熊詒

侍一日湯藥覽受彌留一言

行述

卷二十四

懷素堂

捧手足視含殮以安府君之魄猶得比於子數耶
今何使我至於此極也府君年垂八十以身報
國以勞盡忠以死勤事病起未久日進官署治文書
歸而委頓倦卧兩晝夜奄忽以終時惟 不孝鯉詔
暨兩孫在側 不孝熊詔 方奉

命從軍酒泉見府君再疏乞罷畧陳病狀心膽墮地然
亦夢不到此事莫大於送死痛莫甚於傷心名教
之罪人豈無所容於天地之間惟有一慟而絕速
從府君九泉訴兩載別離之悲叙萬里馳驅之苦

夜臺絮語繞膝相依差可參恨耳更何以生爲哉

題荷

聖明軫恤

特召奔喪感激

君恩勉延殘喘因念府君一生自少至耄立心制行竭力致身諸大節海內無貴賤賢愚皆能道之而不托於當代之文章以附史乘而垂無窮則不孝兄弟死有餘責用是草土表經中日相嚮號哭哭已

備各憶見聞濡血和墨粗述梗槩以脩

行述

卷五

襄葉堂

名煒鉅儒採擢焉府君諱申喬字慎旃松伍其號也

趙氏支裔本宋藝祖自魏王德昭傳十四世爲叔
珍公子貧依外家始遷於常郡西鄉之觀庄以農
業自振叔珍三傳至南沙公思賢世寔以昌南沙
生西溪公鑑西溪生復溪公綱復溪生見淵公珊
見淵生元台公名臣以府君遇

覃恩贈資政大夫都察院左都御史配高氏贈夫人是
爲府君之祖考妣也生丈夫子四王父贈資政大
夫都察院左都御史止安公繼興居第三卽府君

之父自始遷祖叔珍公以下八世至先王父止安
公始以儒術顯補郡學弟子員前明崇禎丙子登
賢書庚辰成進士授湖廣公安令其地有二難
弊曰祿米解之難曰倒站之難曰逃排之弊曰王
庄及隔屬通糧之弊曰旗校及差承需索之弊抵
任未替剔除殆盡歲壬午三院合薦治行爲楚省
第一因入覲遷兵部車駕司主政卽奔元台公喪
歸杜門不出元配前王母贈夫人白氏卒於公安
公皆生子四皆夭殤繼配王母贈夫人白氏乃前

夫人嗣妹也是生府君生之日嚮晨先王母見紅
光滿室俄而分娩心竊異焉甫五齡族難蠶起先
王父變姓名外避渡江而北以推命賣卜爲業族
讐壞我丘壠燬我廬舍府君日夜啼泣不止率直
指趨正張公慎學廉其狀諭邑令敦請回籍然已
無家可歸先王父舟泊郊外不入里門府君令人
負抱登舟執手號哭蓋純孝其天性也先王父罹
難後歲歲授徒以糊八口慨後學波流口下毅然
以師道爲已任自稱江南老教書嘗教及門分析

志氣二字府君隨侍館中父子如師徒十一歲時
作嘗獨立兩節題文結云於此見夫子爲人父之
甚慈凡天下之爲父者視諸此於此見伯魚爲人
子之甚孝凡天下之爲子者視諸此先王父書其
尾云說到慈孝是大道理亦見心術之正固蚤期
爲大受矣然督課最嚴不以獨子姑息挈府君讀
書祖居之觀正地濱西湖一日作文不當意先
王父怒甚府君跪而請責先王父必欲縛沉諸湖
府君哭請曰兒不肖固當死但大人年逾艾如親

續何言未畢而慟先王父亦慟良久而始釋歲辛
丑江陵念謫胡先生在格來視學府君應童子試
以五經七義拔爲一郡冠先王父爲製夏布襦衫
今猶存笥中壬寅遂食餼娶龔夫人合卺未及彌
月卽隨先王父館中勤讀如常癸卯丙午兩躋秋
闕鬱鬱不得志讀書郊外僧寮寺內多孤客造棺
年久朽壞每至夜分青燐滿室恍聞鬼哭府君甚
爲心惻因擇寺後高峰堆塚若干併各立標爲識
以便親知領回故土然終無有遠來識認者若非

爲彼瘞瘵必至暴露荒原矣已酉仍讀書觀莊先
王父手授先正程墨藏本丹黃評騭曰此正宗法
派也府君研精覃思簡練以爲揣摩臨場構藝幾
於句無泛設字無虛下老幹獨立枝葉盡刪一洗
時俗庸濫之習及錄遺兩試無名最後始見收距
場期僅一日耳旣入二場甫脫藁謄真忽有墨痕
汚卷頁急拭之後以筆管作片刮其汚而迹愈露
是科外簾貼例甚嚴凡微有水痕指甲痕者皆被
貼府君自分不免欲火其卷自引決旣又念王父

母春秋高奈何輕生以重傷親意遂於燭下割題
紙小幅爲誓文數百言焚禱於神勉強終卷而出
榜發中式捷音至府君大哭不止 不孝熊詔時方
七歲目覩情景至今追思宛然昨日事也卷出聞
中朱含英先生維高之門而座主則交河蘇次公
先生銓東莞祁如松先生文友也庚戌聯捷南宮
總裁爲栢鄉相國魏先生合肥芝麓龔先生海豐
水壺王先生高平沛蒼田先生而本房則揭陽楊
大山先生鍾岳諸先生初閱府君卷皆以爲老年

名宿相見知年未壯輒驚悅嘉歎先王父喜步
武有人半生沉結幽憂之思亦稍釋而家貧不能
具菽水硯田外無可以爲生者府君爲諸生時館
於皖江釋褐後舊主人復固邀先王父諾之府君
乃仍就館歲束修百金盡遺王父母爲饗殮助主
人封識依然也壬子冬辭歸晨夕色養癸丑適有
豪梁之行過關山謁關廟祈得一籤心動亟歸而
先王父已疾作延醫日進參藥卒不瘳乃拮据棺
衾經營窆安艱苦萬狀越一載而吾母龔太夫人

又捐閭府君義重糟糠誓不再娶自此意興蕭索
啼聲在廬淚痕在枕三年不少輟辛酉筮仕商丘
時曰太夫人在登奉板輿以迎先意承歡婉容愉
色邑最煩劇惟隻手撐撐不資幕客嘗夜燭治官
書徹曙不寐晨出視事端坐堂皇者竟日斷決如
流有投牒者一見問姓名數年後猶能識認邑之
士民咸以張睢陽爲比其地多盜嚴行保甲法如
有匪類鄉約耆老共舉出姓名研訊得實重懲不
少貸盜遂斂跡里甲版籍不清有虛糧而無田者

有實田而無糧者推收時每戶給照單一紙令填
寫田畝四址及在何處完糧隱田者許其自首而
虛糧盡與豁除編號鈐印付之執業後有買賣單
隨契轉或地未盡賣將單呈驗更正併另填單給
付買主糧地由此一清康熙二十二年歲旱民饑
各縣設廠煮賑遠者給米糧近者施糜粥府君親
臨檢視饑民日增倍蓰詎之多隣縣民也問其何
以舍本邑而來此僉言他邑散賑不過虛名安得
如此盡沾實惠乎府君爲之憮然捐俸募貲購米

接濟猶苦不贍署有數緡變賣克用所全活者甚衆窮鄉嫠婦青年矢節白首完貞舉報無人多致湮沒府君諄諭諸生採訪後有公舉節婦者一生流涕不止詢其故自言其母早寡苦節家貧無力表揚今觀此舉不禁感傷府君卽令諸生核報在任數年凡節婦合例者槩請題旌樹坊府君有事出過綽楔下輒展拜以示風勵至以人命控者卽單騎相驗果係自盡立時依律斷結以免拖累有一村離城數十里民家子不知被何人所殺薄暮

來控鐘定後策馬出城至彼處方四鼓在一孤廟
暫憇天明相驗適見伊比隣僻處有一血碑立訊
得實人咸以爲神是夜所暫憇之孤廟久爲妖狐
所據愚民禱祀紛紛有一人夢妖狐云某夜有文
曲星到此吾當退避及府君暫憇之夜適與其夢
相符鄉民有患瘧者用紅箋書寫本縣正堂趙在
此其瘧遂止卽離任後猶然丙寅夏行取進京以
部員用戊辰春補授刑部主事未數月自太夫人
訃至徒跣南奔盡哀盡禮終制後猶然茹素也壬

中冬再補西曹以廉辨著稱楚中有一命案讞辭
多文致例應駁查蒲大司寇不允府君據律力爭
侃侃不少屈卒得減等甲戌春陞副郎未及一月
卽以怔忡疾乞假蒲大司寇深致憐焉里居七載
讀書課孫不輟謁當事惟邑中有大徭役指陳利
弊娓娓數千言絕無一語及私當事亦皆欽服庚
辰冬奉

特旨召見辛巳赴

闕超授浙江布政使

陞辭之日面奏臣受

恩非常敢不竭誠報効如有一事不法願

皇上加等治罪不可比他人例又奏求

宸翰得朝夕瞻仰如對

天顏

上云且看汝一年之後卽策蹇出國門由家之任受事

三日卽具詳兩院請革南糧口袋浙省南糧按月

給發旗營官兵圍領每糧一石兵則歲索口袋一

旗員則每次索口袋一卽不及一石者亦如之派

取民間每錢一折收錢四十府君久廉其弊謂康熙三十九年省倉收米九萬六千七百石有奇派收口袋十萬而有餘約費口袋銀四千兩而不止民力幾何堪此朘削應照京倉例令各自脩口袋關領自是南糧口袋之派累始除州縣解餉雲集親臨兌收筭庫者請示兌法如何府君厲聲曰銀百卽兌百何問焉自是藩庫之加平始革因檄告通屬以欲清州縣虧空先革藩司陋規若錢糧加平若餽送禮節若兵餉掛發若奏銷部費若委署

黃緣若南糧徵收各有陋規盡革除之復刊方幅
小示頒曉里民杜其派累又詳請各營兵餉銀米
並歸州縣支給不必解府以滋需索煩擾又請均
山陰縣坊鄉田畝以絕差役偏枯具載彙案畧存
中寧波里民有豪黠者倡爲照地派丁之說縉紳
巨室多不便之相持不決豪民遂煽衆聚黨入巨
室焚廬毀垣竟有燎原之勢府君聞報夜草一檄
馳發示以地丁原屬兩項不可混合之成例檄甫
至里民擁擠趨觀彼此傳誦羣心帖然無一譁者

事既寢郵合來謁具言前狀曰日者人情洶洶公
片檄一下朝出而夕定非此則事幾殆誠大有造
於海疆者也後提軍趙公至猶領手相慶其言亦
然司有府解戶役一欵爲貼解本色物料及雜項
錢糧之費歲支不過什之四五存卽籓司羨餘也
府君秋毫無所動將授代命主者核其籍尚存二
千餘金爲之封識別貯待新司至盡歸之曰吾上
年奏銷未用一錢繼我者勢必不能兩年之間一
革一因恐駭民聽得此足辦今歲事矣毋再擾民

也吾家距杭州一衣帶水舟楫甚便府君諭家人
有事往來輒攜米十數斛儲署中用或謂府君曰
公清風峻節今無兩矣然出爲方伯饗殮仍取給
故鄉毋乃有平津布被之嫌乎府君曰君言良是
但吾之爲此者實以寥寥數口挈之偕來薄田所
出完納正供而外無所用之吾取之杭則需購取
之家則現在譬如輸粟於杭易金數十以羨補不
足可乎言者感歎而去壬午春遷本省巡撫益以
察吏安民爲兢兢自籓署入轅門襖被一肩書卷

數麓依然初涖浙時也旋蒙

上賜御書崔子玉座右銘裝潢什襲復恭摹勒石安奉

署內

御書亭時瞻誦以自警府君之拜恩

龍錫曰此始大堂揭一聯云

君不可負只是心難負負心者不容於堯舜天不可欺
誰謂人易欺欺人者如見其肺肝嘗誠曹掾曰吾
無幕客一切案牘皆吾手理目營汝曹若相欺能
保事事不敗乎掾言掾雖賤亦有天良如公者尚

相欺天良安在掾故不敢實亦不忍言已泣下府
君爲之勁容錢塘江逼近杭城汎潮洶湧最險惡
府君任藩司時力言於撫軍繪圖題請部議准借
歲修款銀興築府君復盤檢羨餘悉克工用委溫
州郡丞董其役圯者新之缺者補之地當衝嚙者
土易潰則易以石更鎔鐵貫其中併築子塘以護
其基壬午秋潮更猛圯刷且甚新塘可虞聞志乘
江神陳賢乃宋進士卽浙之嵎人舊有封祀府君
齋戒三日虔設牲醴自撰祝文告之率僚吏將士

赴江干祭告甫畢而潮已至風狂浪激吹水皆立
觀者踉蹌奔避俄潮距祭所百餘丈即止官民環
擁目擊人人駭異此康熙四十一年九月十三日
事也嗣後潮汐俱不逼塘得以及時施工至誠感
神豈虛語哉是歲當大比先期拜疏請增解額格
於部議

特旨允行入闈監臨內外肅然無敢以身試法者分校
諸君原廩屏息尤甚及主考武闈亦然十月奉

命往湖南會審鎮筸紅苗道經公安止安公井棠道愛

俎豆蠻官府君解鞍詣名宦祠爲文以祭云憶昔
壬午父離此鄉越今壬午兒經是邦六十一週數
乃適當令德不朽視茲烝嘗士民觀者俱艷爲盛
事歲杪調撫偏沅歸途聞

命適癸未春

皇上閱視河工府君疏請

陛見馳赴

行在屢覲

天顏疊蒙

顧問

賜御製督撫箴

御書綏輯撫安扁額又以湖南積習相仍私徵無藝
特頒坐名

諭旨力減加耗盡革私徵如有藐法害民者糾參從重
治罪

陛辭之際又蒙

皇上諭云汝勉力做去府君初下車卽通飭各屬建立
上諭碑亭勒石以垂永久行牌首禁私派重耗其畧云

湖南地瘠民貧苦累不一其最可痛恨者莫如橫
行私派與重收火耗大約正供之外巧設軟擡硬
駝公費腳價諸名目有每糧一石加派四五錢至
二三兩不等者有借稱公務逐事私派一年之內
難以計數者又花戶完納條編重戥秤收每兩加
耗二三錢不等嗟此窮黎敲脂吸髓未飽虎狼剝
肉醫瘡誰憐鳩鴿今我

皇上洞燭情弊嚴行禁飭且姑寬既往許以自新嗣後
該地方官不遵

諭旨擅行私派仍收重耗而司道府廳亦利其賍私通
同徇縱本都院立刻叅拿治罪斷不姑爲寬假使
髓枯赤子終無求活之門膽大貪官仍享悖入之
利又行牌特除上行下效之積弊共砥大法小廉
之寶政州縣亦邀一命豈有賢不畏死所以橫行
而無忌總由上下之通同郡守者州縣之表率也
今知府直隸知州多取之州縣則州縣不得不多
取之百姓知府直隸知州如此更進而上之諒有
同心無待言矣伏讀

御製督撫箴有云曾是源濁而流則清曾是表正而影則傾大哉

皇言澄源端表當自巡撫始本都院先以一已爲屬員倡如巡撫稍有不肖之念有非法之事爾等官民卽當共聲其罪以爲負心徇欲之戒倘本都院正已率屬自問無愧而爾等屬員仍然需索下屬刻剝小民本都院嫉惡如仇斷不能姑容收贖霜簡一登身名俱喪毋貽後悔又出示嚴禁欲保湖南私派橫行固由於官吏之貪污尤起於欺保之包

攬地方無賴棍徒投認歇保魚肉小民借私派以
逢迎州縣卽借私派以分潤肥囊不肖州縣隨其
牢籠不得不受其挾制稍不如意卽引類呼羣指
贓嚇詐始而害民繼則害官歇保之流毒至此今
州縣私派陋規已嚴行禁革如有大胆棍徒仍借
歇保各色包攬錢糧派索雜費被害人卽指名呈
控以憑立拿重處地方官徇庇不舉卽以知情一
體叅究又再飭大法小廉之實政以塞貪源以飭
吏治事本都院數載以來衣粗食糲早作晚休不

敢圖巡撫之體面不敢累屬員以口腹無非以身
作樣感悟他心然律已寧刻而待人常寬不以已
之所爲而強人以難湖南屬員未嘗一文不取食
稿飲泉也卽不能爲古之廉吏亦何至爲今之貪
官乃有如安化縣之多收火耗岳州衛之私用重
法署湘潭之見事婪贓黔陽縣之遙禁雜派各皆
功名不保何嘗落得便宜至於道府直隸知州尋
常交際之外更復百計苛求始而托言借貸繼而
預支節禮查新例內上司與州縣借貸等弊發覺

照貪官例處分該司等漫無稽查是失察也知而故縱是徇庇也飭吏治以安民生塞食源以彰國法不得不於該司是問倘仍瞻徇徑行題參後悔無及至驛鹽糧道衙門尤爲竊弊之藪而撫院衙門規禮亦自不輕府君盡行裁革徹底澄清如驛站之積弊有驛州縣不令坐支將本款實徵銀兩解道令驛丞赴道請領或卽有坐支之處先具小批呈道抵兌年終總具大批更換冬一請領抵兌卽冬一需索勒扣又州縣設有買補倒馬銀兩自

應隨倒隨支隨補以資驅策必將額銀解道請領
再三守候需時終不給發因嚴飭該道官吏將各
驛所需夫馬工料等銀先儘本州縣實徵銀內坐
支如有不敷應照銜僻冊內徑支各州縣驛站銀
協濟其州縣坐支銀數俱令按季詳報該道不必
另起小批赴道抵兌以滋索扣其倒馬銀兩務令
支用隨倒隨補不必解領煩擾致貽壅難而各
驛始免苦累漕糧則頒發制斛當堂較驗令州縣
官收官解毋得僉派里民包收包解又毋得藉稱

赴岳買米違例折銀多勒重價而糧道衙門清規亦嚴行禁革至湖南鹽價昂貴實因各衙門鹽規恣行需索以致商人愈無忌憚高擡鹽價府君赴任過武昌卽傳集各商面諭本衙門陋規盡行革除如有食言卽不得由此回家一時觀者皆合手讚頌抵任後卽嚴飭官吏不得仍前需索鹽商規例以致貴價累民又嚴禁長岳常辰靖五府州行鹽各商必須每包比前減去數厘併令長善兩縣將鹽價增減逐月詳報再檄行司道的衙承寶三

府鹽價總以長沙之現價爲准衡州府多用銀二
分零永州府多用銀三分零寶慶府多用銀四
分零總以長沙價值低昂增減此外不許多加各商
鹽稅務照糧食行馬同其輕重不得任意多加鹽
租務照淮揚解包斤數發賣不得任意抽減嗣後
各商稍知畏法民間不苦淡食至南糧秋米一項
例應七月間徵因撥供本省制營兵丁月米只得
先行徵支而州縣不分兵米解部之項一槩混徵
因飭令該道預期酌定州縣實徵米數分出應給

兵米若干應解部若干給兵者按月徵收支放解
部者照例七月間徵又有三叩

聖恩事一疏云湖南各營兵米請將上年解存米石預
撥次年春夏三季兵米一案兩經會疏具題兩准
部覆毋庸議但各營兵米每於正月卽赴州縣支
領彼時地丁尚未間徵南秋從何輸納兵不能待
民不能完則州縣官那移應墊反虧應解之項者
情亦有之查上年解存克餉南秋米石存貯該道
俟米年奏銷後於九月內准部文折銀解部該道

於十二月間纔委員起解則春夏之時前項米石
乃貯道候解之項何不可爲撥給兵米之需今准
部覆若預爲撥給恐該管官員將上年存剩米石
恐有虧空希圖掩飾情弊但前項米石解貯該道
約將一年方行折解若有虧空掩飾情弊則應在
貯道一年之內而不應在預撥春夏二季之時况
兵丁需米刻不容緩照數領米毫不容少誰許掩
飾虧空而肯以無爲有以少爲多此又情理之易
見者臣故不辭冒昧再敢瀝陳奉

旨該部議奏部覆應如所題奉

旨依議由是兵有飽騰之樂民無預徵之苦矣又有軍
命倒懸澁情額救無悞急公事一疏云科臣戴璠
條奏漕糧每年抵通多有掛欠嗣後耗贍漕截銀
米暫存糧道倉庫內俟回空時倉場查明行文到
日按其掛欠數目扣存倘猶不足將行糧一併扣
抵如交納無欠照數支給已經部議題准到臣隨
卽轉飭糧道遵照而湖南六衛一百八十二船旗
丁環繞臣署連日呼號查湖南運道遠於江浙而

漕截漕贍又惟江浙爲獨有科臣條奏似止從江浙起見今若併及於湖南則湖南並無漕截漕贍惟藉此二耗行月銀米以資飛輓今既扣存二耗僅以五十兩四錢之行月歷江湖涉淮黃越數千里以達於京師竊丁卽有急公之心重遲終鮮神輸之術束手坐視必至誤漕迎合閭閻豈能枵腹置身在地方不敢諉之相隔數千里之漕臣卽將二耗照舊給發各船旗丁責其尅日開幫仍取具不致掛欠其結存案如有掛欠臣卽親追賠補倘

追補不前願照定例并受處分至臣理應候
旨給發實以漕船待此開幫恐致遲悞非敢擅專伏乞
聖明慈宥奉

旨這耗贈米石若不預行支給旗丁必至困苦卽無掛
欠何省或有不肖官員不給旗丁侵蝕入已亦未可
定趙申爵將耗贈米石預給旗丁甚是爾部照戴璠
條陳議奏不合這事仍照舊例行是時

上巡幸江南閱視溜淮套工程府君馳赴清江浦迎

駕蒙

溫語下詢

頒賞哈密瓜葡萄條松瓜條乳餅羊三隻餅

賜綠松寶硯一方玻璃眼鏡一匣

恩遇有加於瓜洲八里鋪跪辭回楚四月初抵長沙署

卽出示云本都院往返兩月有餘盤費五十餘金

俱係支俸脩用誠恐不肖官吏借名科派爲此特

行曉諭後嚴飭學政畧云學道不易做做好學道

更不易非咬得菜根不能做好學道非硬着骨頭

不能做好學道非破得情面不能做好學道非擦

得功名不能做好學道真可鍼學使之膏肓矣又
飭令速發紅案以杜倒提添換等弊至教職官員
例於本省銓選但全楚地方延袤數千里中隔洞
庭其湖南貢生選授湖北者途路既遙風波復險
或苦於盤費而力難赴任或渡湖阻滯而恐限多
違因爲題請將現在候選貢生嗣後籍係湖北者
則選湖北之缺籍係湖南者則選湖南之缺蒙

旨俞允著爲定例而寒儒老生得免險阻之虞矣長郡
舊有屈賈祠真西山祠蔡周二忠祠俱加修葺而

二忠祠祭田撰記勒碑永杜侵蝕蔡公則更爲詳
其殉難本末而表於其墓至宋李忠節祠及前明
劉忠毅祠俱爲居民侵踞春秋兩祀久不設矣亟
會有司勘實清廢舊址重建祠於其地俱有碑記
又將忠毅公從祀學宮以垂不朽嶽麓山有道鄉
臺其碑尙存而祠座已圯因檄有司將碑豎立棟
宇臺城悉皆修整復另買書院前隙地改建一祠
併郡舊有趙忠定祠燬於兵燹亦將基址清出重
設祠宇與道鄉祠俱有碑記凡以崇獎忠義風勵

頑懦也至各屬舉報節婦飭令州縣詳本府後卽
通報院司如府詳逾月不到卽提府承查訊府詳
一到立批司詳覆隨到隨題而沉擱勒情之弊絕
復爲題請節婦建坊銀兩應仍照舊例於師生空
缺俸廩銀內支給部覆應如所請奉

旨依議至今遵行焉府君道貌岸然而屬員謁見必和
顏霽色使得各盡其情且開心見誠不屑逆億而
下屬之面爲欺罔後自敗露者則不能寬假如某
令徵收地丁司法一兩發票七錢二分某令借名

田畝科則私派數百兩某州誑騙上司嚇詐同官
初亦嘗加意優待某藩之負

恩庇貪曾經保題留任後悉登白簡非得已也其有操
履廉潔辦事勤慎如衡永道張公粵東開府楊公
初任藍山縣令汀州郡守高公初任常郡別駕皆
膺卓選粵東方伯王公以僉事道題陞臬司薦牘
已上勿使之知也康熙四十二年府君隨

欽差招撫紅苗將撤兵時制府喻公帳前有乘夜放槍
者一時俱爲震駭而府君帳下止有標兵二十餘

名防衛然處之晏如聲色不動及明日各營俱策
馬疾馳府君獨覽轡徐行絕無匆遽之色丁酉冬
蒙

皇上尚加嘉獎具見

聖聰之無微弗徹也至爲朱閣學誣案又被俞提督訐
奏幾罹不測俱荷格外

殊恩曲賜保全府君每一言及輒感泣不能自已辛卯
正月蒙

恩着還原職陞補都察院左都御史隨具疏奏

謝司道以下擬送贐儀以脩芻秣府君面諭云我撫
湖南八年止有隨丁二十名咨明兵部食守兵糧
每年有二百多兩餉銀七十二石餉米爲日給之
需此外並未收受官吏兵民商人等銀錢豈今日
陞任而改節耶槩堅却之上年二月解任候審部
文到時府君適在岳郡舟中百姓一聞此信統舟
號哭者不啻千百計此番內擢啟行士民知勞難
扳留皆執香叩送數百里絡繹不絕多建耑祠繪
像以祀歟曰見公像如見公也又搜輯在任時奏

章者移批語憲牌禁示藝文稿共若干卷鳩工鏤板名曰趙公實政錄以垂永戒而志不忘孰謂斯民之無直道哉任總憲時不敢營私而植黨不務搏擊以沽名惟仰體

皇上如傷在念泥澤覃敷有

聖世施恩已極一疏畧云查潼關衛與大同府五十一年應徵米荳草束以不徵銀兩獨不在蠲免之內然本色折色總出地丁項下康熙四十二年

聖駕西巡已將以前各項積欠銀米草荳盡行蠲免而

五十年奉天所屬應徵米荳部議亦予蠲免至臺灣五十年應徵穀石奉

特旨以已經徵完在官雖蠲免與小民無益將五十一年穀石着行蠲免今潼關衛與大同府五十一年未免米荳草束應否一體恩蠲倘或已徵在官應否照臺灣例准於下年

萬壽大慶之期同邀蠲免則秦晉編氓永戴皇仁於億萬年矣部覆無庸議奉

旨潼關衛大同府所屬五十一年應徵米荳草束既已

徵完今雖蠲免亦無益於小民明年應徵米荳草束
着蠲免是年大同府應州荒旱特甚

恩旨一頒萬民悅服又有禁逢

萬壽昌期謹推三年蠲免錢糧之例請免民房地租以

廣

皇仁等事一疏畧云天下地丁錢糧三年之內全免一

週夫耕

朝廷之士者已獲蠲免新舊之賦棲

朝廷之士者亦冀蠲免新舊之租伏乞

勅部將地租併舊欠實數查明開奏應否照蠲免地
下錢糧新徵舊欠之例出自

天恩得蒙

俞可列入康熙五十二年三月十八日

恩詔欵內辛卯秋典試京闈壬辰會試總裁皆焚香設
誓藉明神以佐

國法評閱每逾午夜緝繹或達晨曦經藝與書藝兼
衡後場與前場並重諸經房遺卷有佳者搜羅無
失殫精疲神以至手皸目眩不自恤也三月十一

行述

卷五

庚戌

日府君尙在禮閣

特賜視一方是年冬九卿面奏江南督撫互劾一案

上諭及天下清官因云趙申喬任偏沅巡撫時居官甚清但有性氣人皆畏其口直與俞益謨互相訐劾彼時亦有以趙申喬爲非者朕細加察訪卽彼所轄武官及陝西人良心不昧俱言俞益謨之非無有以趙申喬爲不是者清官固所當惜而其言之不可行者朕亦不行如趙申喬條奏黃河埝地免糧一事朕亦不准行雖所言未當而並無私見凡交與伊一應事

情皆實心辦理朕是以護惜之至府君叩謝

天恩而感激之私非可言喻

皇上六旬萬壽

賜貂帽一頂團龍緞袍掛一襲松花石硯一方

恩詔覃恩封贈三代併蔭一子入監讀書夏四月

上因粵東米價騰貴恐民乏食停徵本年錢糧又差府

君偕傳少宰前往會同督撫減價平糶倉穀順便

賞資兵丁府君恪遵

聖諭一到粵東卽通行曉諭宣布

皇上德意復會同督撫商確平糶價若太減恐商買聞風不至以一兩八錢爲始後市價遞減則平糶之價亦減直減至九錢糶食小民俱鼓腹稱慶粵地濱海又時值溽暑夜間蚊蚋甚多府君不收供應將所脩帷帳盡行撤去諸僕隨侍者多苦蚊噉不得安卧府君獨寢一室則寂無蚊聲過歷各郡皆然至今宦粵者詫爲異事甲午仲春回京奏覆稱青時已遷大司農部務冗沓卯出酉歸寒冬甚短則將素卷帶回寓中燃燈批閱卽多至數百件亦必於

深夜看畢漏下恒至四鼓歲歲如是其有支領錢
糧者必詳慎勾稽不敢徇私以糜

國帑雖叢怨招尤勿恤也時直無題爲派官丈量等
事疏稱直屬旗退地內原有兩項一係退還民人
行差納糧奉

旨停圈一係退出民人承種輪租例應圈撥今河間府
滄州有旗退民地七百八頃有奇久奉

恩綸永停圈撥百姓行差納糧載在全書造入奏冊自
康熙四十四年以來有庄頭劉存及盧章等在內

務府具呈指要此地兩次共撥地一百三十頃餘
畝今有庄頭李必達等又奉行撥給六百一十頃
零臣竊思李必達等不得此地尙有別處旗退輪
和地畝可以取撥請將李必達等在各屬旗退輪
和地內均勻撥給等因部覆不准併稱將不行丈
給之知州知府指名題參府君又議得庄頭李必
達等所要滄州旗退地畝原係順治四年以後旗
退民地康熙八年奉有

恩旨永停固撥迨後有庄頭劉存及盧章等指要此地

由部具題一撥地十二頃餘畝一撥地一百一十八頃今又有在頭李必達等具呈內務府由部行文圈地六百一十餘頃據該撫稱滄州旗退地畝滄民納糧行差已久原與迄今旗退地畝召種輪租者有間今取撥愈多滄民一失此地則千百窮黎俱無倚賴勢必失所旗民均屬

朝廷赤子

聖主原無異視請將李必達等所要地畝在於各屬旗退輪租地內均勻撥給等語該撫身在地方目擊

民艱爲民請命應如所請以免窮黎失業以廣

聖主洪慈奉

旨依後議又有買賣人馬維屏等具呈愿備本銀萬兩
交部照定價領換大錢在京城內外及行使小錢
各地方換買陸續交局收鑄奉

旨着交包衣昂邦內務府准其所請將稿送戶部會題
府君獨未書題奏爲濫情再陳等事歷指買賣人
欺

君圖利之弊五十四年總管內務府又與戶部會議得

展限原爲小錢難以驟禁故寬限而大小攪行止
於商民兩便若准買賣人馬維屏等所請使其收
買小錢則錢價騰貴亦未可定且恐奉行不善或
致多事不無擾累地方殊屬未便將馬維屏等所
呈之處無庸議奉

旨這事議得很是康熙壬辰科

殿試克讀卷官乙未科

殿試又克讀卷官癸巳之秋府君差往粵東

不孝熊詔

代父求

皇上賞給匾額蒙

賜御筆匪懈堂三大字至是年乙未七月又蒙

恩賜

聖製七言律詩大金扇一柄又

御書水能滌性爲良友竹本虚心自得師對聯一副真
異數也至

內府圖書

頒賜便蕃永爲什襲之寶丁酉三月因奏稱鉛劬壞爛

部議照溺職例革職奉

旨着革職在任効力四月間又因前議劉芳昇等一案
與九卿兩議自行檢舉九卿議應革任奉

旨從寬仍留任戊戌春當大比府君正在議處又自以
齒力衰邁腕疼目眩移部注明屆期宣

旨仍奉

命偕家宰張公爲大總裁惟

聖主深信不疑故屢膺

特簡數年來肅大司農孫公冲襟汪度每事協力同心
府君得以自盡所懷勉供職嘗諭兒孫云父母

罔極之報吾守身不失庶幾無忝所生惟

君恩高厚生生世世報答不盡故雖桑榆景短而戀

主情切不敢言私然精力日以消耗形容日以憔悴府

君竟不自知也本年三月寒熱數日忽患瀉泄不

止十五日猶至西苑坐班歸寓連瀉數次足冷

至膝十八日叩祝

萬壽不能自起賴同官扶掖成禮因具疏乞休奉

旨卿効力年久清勤自勵簡任司農正資料理著照舊

供職不必以老病求罷該部知道府君感極涕零隨

伏牀叩頭恭

謝又因渴不能支足難履地有微臣衰病等事一疏

仍蒙

溫旨慰留又奉

上諭前日覽戶部尚書趙申喬辭本朕深憐之念其操守到老清廉性雖暴躁爲人朴直年近八旬病勢難料全愈倘一時難保亦未可定趙申喬乃革職留任之官着照陳詵之例復還原職當賂之銀一槩寬免內閣將此口傳旨意着速發去令病人早知一天或

五內少得安寧服藥調攝即可願養也府君跪誦
天言爰隨聲下隨具摺遣子經詔賁往熱河謝

恩又蒙

皇上兩次賞賜膏藥及藥丸隨貼臍併尾間腹泄頓止

七月間足痛漸愈隨於二十四日親赴熱河叩謝

皇恩獲覲

天顏不勝欣幸八月初自熱河歸卽進部辦事彼時身

體尙未復舊祇以受

恩太深國報愈切不敢再以衰老求退又不敢在寓偃

息自蹈曠療朝夕勞勩不異從前十月望日隨諸

大臣忭舞師

賀又蒙

過諭垂問歸語兒孫闔門感泣十六日更定後回寓心
神恍惚語言蹇澁明早稍覺清爽仍赴部如常十
九日又隨九卿赴西苑二十日尙力疾到部蒲
尙書孫公慰勸始歸二十一日力乏不能起床口
中喃喃不絕仍是部內事二十二日喘急愈甚易
贊之夕兩目睜視自嘆

主恩未報賈恨重泉口授四子

經詔

亟繕遺疏時

不孝

熊詔婦

侍疾床前念

不孝

遠涉西隄未卜稅駕因

涕泣逡巡與或一語家事府君張口顧之終亦無

一言道

不孝經詔

捧參湯以進而氣息益微不復

續夾嗚呼痛哉此情此景

不孝熊詔

總未獲一見

也卽碎身萬段夾厠剝心摧筋剔骨豈能蔽厥辜

而銷長恨哉二十五日晚

上見遺本卽傳奏事大人問趙中喬是幾時沒有如何

沒有的皆回奏云不知奉

有趙中丞効力年久清勤自勵簡任司農實心辦事忽聞遙逝朕深爲軫惻應得卹典著察例具奏二十七日

特命

宗室公 南書房張少司寇漢侍衛六人臨奠茶酒行三叩禮不循常格禮臣具典禮以聞蒙

賜卹如制旋閣中擬謚上請

特予恭毅 不孝等 子子孫孫卽捐糜頂踵未足仰酬萬

一也語云知子莫若父知臣莫若君先王父之臨

沒也呼府君曰爾知字汝意乎諸葛武侯王佐才
而其自信不過曰謹慎而已今府君不惟恪守慎
之一言且并武侯之鞠躬盡瘁死而後已者視之
亦無忝蓋先王父命字時已有前知矣府君與人
交終身無悔容色爲撫箴接見屬吏必以禮入
居九列動容辭氣滋益恭庶幾乎古君子行已之
道生平問學尤篤信朱子以居敬窮理爲宗雖簿
書冗沓小學近思錄及河津讀書錄敬齋居業錄
日置案頭稍暇卽繙閱不少間曾子論士之弘毅

終之以久而後已朱子所謂一息尙存此志不容
少懈也今府君刻苦數十年品行經濟盡在

賜謚兩言之中非

皇上深知篤信於老臣何以得此然則子臣之受知孰

有過於府君者哉居常訓不孝輩曰今人多好以

清官自負夫清非僅不名一錢之謂須兼得廉明

兩義庶則一塵不染如冰雪之清明則一毫不蔽

如水鏡之清若一介不取而處事糊塗世安用此

清官爲吾外歷藩撫十載何曾做得清官來如初

蒞浙藩時覓解協餉每平皆贏出錢許詢之庫胥
則云前任收兌稍重些需然亦不過數宗其他不
盡如是數月後積少成多剩可四百餘金吾藉以
餉口兩載此可謂之清乎撫浙不及一年變賣本
衙門朽壞號船一隻併司書繳進水手工食銀共
七十兩有奇爲差往鎮筭路費此可謂之清乎泊
移撫偏沅隨丁二十名各部食守兵糧歲得餉銀
二百餘兩米七十二石閭署待哺於此可謂之清
乎所自信者吾於地方利弊民生疾苦蚤作夜思

知無不爲爲無不力差免糊塗之責耳至於戶部
衙門則不然一有苟得絲毫皆不義財非執法欺
君此錢安得入手故吾在部遇事無一錢可取辦事亦
非一人可專殆於名利兩失也凡吾所爲有不可
以告

皇上者卽不可以告家人爾曹雖不言吾能不內愧於
心乎府君不飾名不矯節循理而行審義而處生
平無大事不可對人言者大率如此 不孝兄弟並
駕下命途復多舛不能爲府君分憂往往反以事

貽老親憂丁酉二月

不孝熊詔

被同官誣訐記注

一事吏議必欲竄之歟請移謫西曹

上洞悉無辜折本者再令傳問九卿亦僉議如前本既

上而

旨未下時

不孝

待罪

西苑寓中薄暮府君馳一介至

且攜一闌枰賜

不孝

笑曰一有消息速報我旋聞

上復折本

不孝

感極痛淚失聲而慟即作手稟遣家人

馳還抵邸舍已嚮晨府君猶一燈熒然兀坐以待

蓋竟夜不寢矣翼日府君以奏事至西苑語

不

孝曰疇昔之夜神思荒亂殆不可言狀所以搆一
柑啖汝者恐一從吏議汝便當入諸室吾豈能卽
與汝相見故以此畧示分耳耳尋荷

聖朝矜宥不孝僅削職仍供奉

內廷善父率不孝涕泣謝

恩兩月之憂懼始釋仲弟鳳詔初授山右沁水令府君

適任西曹臨岐誠囑有詩云保民若子方成子治

邑如家莫爲家所以鳳詔外任廿餘年從未敢以

俸資攜寄故鄉買田一畝置屋一椽此姻黨皆知

之戊戌春 周詔 惟於法府君方典試南宮出闕後

始知之曰此子負

君恩歟

國法吾何悲焉但吾老矣不意暮年見子刑戮也自
此慘戚之容時見於色是挾部檄原籍查家產邑
令意有希合以寒家薄產無幾難以開報遂及三
黨羅織橫行二三親戚凡有餽粥田數頃者輒繫
之獄盡籍其田以充數至於寒舍所有一盃一箸
一紙一縷悉登冊以輸之官賴觀察李公鹿山太

守劉公委曲維持令亦料然不顧猶以為未足

力請於上官疏奏

不孝鯉詔

號職嚴遇將得而甘

心焉疏入府君憂之甚憐之甚如

不孝熊詔

待罪

時乃蒙

皇仁浩蕩免查追不惟

不孝鯉詔

幸獲生全諸親戚

皆反其故物得免餓殍府君聞

命淚如雨下曰

上實使老臣再生恐老臣不能報矣世世子孫敢忘此

目乎

不孝熊詔

次男

佺微

府君最鍾愛襁褓中即

提抱左右出就外塾自課之識字讀書九歲後府君宦浙宦楚俱挈之隨任命庶母張撫之兒亦善承意指瑣屑事頗知分勞辛卯春挈入都府君雖官御史大夫而僮僕參參門無賓客不孝熊詔復保直禁中扈從塞外定省多闕不孝鯉詔以丘墓祭掃數往來南北間蕭寓晨昏惟祖孫兩人聚首未嘗頃刻離也戊戌五月企敘忽以暴病歿府君哭之慟連呼曰天喪予既而曰吾非敢妄比孔顏也以吾兩人相依爲命並同此痛耳時不孝熊

詔隨

駕熱河吾父命

不孝鯢詔

爲治棺衾寧從厚厥後府君

貌益憔悴意緒更復無聊每退食歸寓形影淒其

輒呼孫乳名哭之逾歲後猶然

侗敦

生男

元次七

歲端慧如成人丙申以痘殤府君悲不自勝曰此

吾家曾孫也曾孫與曾祖中隔兩葉且面未相識

然天性之痛欲迴轉溪良由我有餘殃累及童穉

因手書遺語十數行命家人南歸持羹飯詣塚哭

焚之孰意今日

不孝

不得侍吾父而

仝徵

反得長

奉色笑如舊元次亦從地下初見曾祖跪拜起居

也嗚呼痛哉府君少丁族難中膺劇邑未齒敦歷

中外隻手指掌勤苦勝於諸生時屈指七年大抵

憂患之日居多燕閒則愁眉默坐出接賓客間亦

酬荅歡笑從未露齒縱聲比年骨肉凋殘生離死

別感舊傷今老而彌甚加以年運輒軻動輒得咎

操心慮患晝夜靡寧以故氣血日益耗精力日益

枯一蹶而幸復支再蹶而遂不起也嗚呼痛忍言

哉府君篤於友愛止安公自生府君後閱二十年

復舉一子卽翰林院編修提督山東學政蔚什公也止安公捐棄時蔚什公甫十一齡府君雖保護脩至而督課不少姑息俾學業早成稍長爲納聘完娶以祖遺屋讓與弟居而已另覓棲椽於分析祖產外又將百畝田價先與其弟而後及其子丁丑蔚什公成進士時府君

予告家居郵書都中云痛思往事無忘吾父之艱難茲念永圖寧效乃兄之迂拙蔚什公事兄如嚴師卽登第後恂恂恪謹奉此二言以終身及筮仕遷江

府君爲拮据資斧始得抵任癸未之春府君隨

駕至維揚啟奏云臣今年六十歲臣弟申季四十一歲

現爲廣西遷江令遠在瘴鄉臣年已老恐此生不

復與弟相見

上問汝兄弟爲人如何奏云凡事謹慎甫一載而有引
見之

旨由縣令入翰苑卽出典文衡因試士積勞卒於濟南

府官署府君痛悼殊甚具疏代謝

天恩畧云近得家信臣弟申季性以受

此日夜椎心泣血恨不得相從於地下也嗚呼痛
其有極哉吾母

皇清誥贈夫人龔氏庠生雨若公女贈文林郎湖州府
推官鹿莊公孫女于歸時吾家用布幔肩輿無力
脩鼓樂彩轎外家被盜燬其廬亦不能稍具奩資
母夫人粗衣糲食泊如也先王父治家最嚴屋宇
湫隘內房與外間書齋僅隔一垣母夫人歛容屏
氣不敢有笑語聲先王母自太夫人溫煦慈愛母
夫人朝夕隨侍脩得歡心與諸小姑尤和好無間

丙午秋府君被放至更深後母夫人猶飲泣不止
府君寬慰云吾年未及壯未必無出頭日子汝不
必重自苦母夫人揮淚云吾非慮爾無進步惟念
阿翁春秋高試事兩番報罷無乃重辜老人期望
府君聞此言亦不禁悲慟越蒞載登第母夫人喜
動顏色欣老人之及見此也後府君歸里母夫人
面語云吾家不能學他家具冠輅亦不能買絢綺
爲我製青布衫足矣府君如言製服癸丑仲秋先
王父疾大漸亟治棺木有親知來告云治棺之日

與衆婦壬午命相衝大爲不便府君擬爲改期而
母夫人堅持不可曰奈何以我故遲悞老人大事
且修短自有定數無慮也迨甲寅秋遭疾彌留時
執白太夫人手嗚咽不忍釋且云婦職未終反以
諸雛累阿姑歿有餘恨而捐問之期與先王父屬
續之月日時一一相符天道果有知耶其無知耶
而母夫人孝思肫篤不暇自顧可勝痛哉府君嘗
語不孝兄弟云吾與汝母伉儷十五年爲貧所困
歲歲舌耕其得聚首者不及三之一耳輒淚下不

能止而不孝兄弟終天之恨真無已也府君生於

順治元年六月十八日卯時康熙庚戌科

賜進士出身歷任戶部尙書兼管錢法堂事務康熙五
十二年三月恭遇

萬壽覃恩誥授資政大夫都察院左都御史卒於康熙
五十九年十月二十二日酉時享年七十有七歲

特旨諭祭

賜全塋

賜諡恭毅康熙六十年十月二十七日合塋於母夫人

棲巒鄉黃塘之兆母夫人生於前崇禎十五年二月初六日酉時卒於康熙十三年八月廿四日卯時享年三十有三歲康熙五十二年三月恭遇

萬壽聖恩誥贈夫人庶母張氏先卒子四長卽 不孝熊

詔康熙己卯順天舉人己丑進士

殿試一甲第一名授翰林院修撰

覃恩加一級勅授承德郎陞侍讀奉職仍

內廷供奉

特旨効力肅州軍前娶陸氏

單恩勅封安人廩貢生候選訓導來亨公女前丁丑會

魁浙江按察司副使友洙公孫女次 鳳詔 康熙丁

卯舉人戊辰進士原任山西太原府知府娶唐氏

文學木叔公女次 鶴詔 早卒娶白氏苦節三十年

卒待 旌文學寶成公女次 鯉詔 康熙戊子舉人

候補內閣中書娶楊氏內閣中書岱麓公女順治

壬辰進士福建布政司參議青巖公孫女女二一

字康熙庚戌進士山東莒州知州介公劉公子太

學生涵一字康熙庚戌進士湖廣布政司參議內

陞京堂厚存莊公子太學生俱早殤孫九個

教邑庠生

欽取集修

恩賜入監議叙知縣卽用娶黃氏康熙丙辰進士直隸

順德府知府岑廣公女順治乙未進士刑部員外

郎艾庵公孫女在徵太學生早卒娶張氏康熙甲

戌進士翰林院侍讀學士提督順天學政天門公

女順治辛丑進士文華殿大學士贈太子太保謚

文貞公孫女備教太學生出嗣弟娶儲氏康熙

已丑進士翰林院編修中子公女康熙丁未進士

山西清源縣知縣遜菴公孫女行教太學生娶王

氏康熙壬辰狀元翰林院修撰寶傳公女康熙庚

午副榜禮科給事中耳谿公孫女俱不孝熊詒出

健叙娶徐氏康熙丁丑進士陝西西安府知府个

臣公女鳳詒出位敘聘陳氏太學生震先公女貢

士候選州同敬仲公孫女淵滄道崇議卽功公會

孫女不孝熊詒出備敘聘許氏康熙庚辰進士山

西垣曲縣知縣詒孫公女倚教聘劉氏康熙乙丑

進士四川布政使青岑公女順治壬辰進士戶部

員外郎西水公孫女傳教幼未聘俱鳳詔出孫女

十一一適順治乙未進士浙江驛傳道芳蔣公

子太學生宗琰一適直隸唐縣知縣後國李公子

歲貢生國繩一適山西大同府知府崑霞洪公子

太學生公案俱不孝熊詔出一適康熙辛未進士

山西朔州知州省堂莊公子太學生楫鳳詔出一

字甲子訓榜教習知縣公榮自公子永照早殤錫

詔出一適直隸密雲縣知縣勅授文林郎爾顯

楊公孫候選縣佐翰掌楊公子太學生方升一適

康熙己丑進士翰林院編修中子儲公子太學生

傳泰俱不孝鯉詔出一適康熙戊辰進士山西澤

州知州艾剛陶公子太學生候選主簿祥武鳳詔

出一字太學生震先陳公子廷楨早殤鯉詔出一

適河南巡撫都察院右副都御史宜君楊公子太

學生文健一字康熙乙丑進士四川布政使青岑

劉公子太學生純端俱鳳詔出曾孫四壽男側敷

出葉男側敷出智男側敷出貽男側敷出俱幼未

聘不孝熊詔等創巨痛深神昏思瞢語無倫次掛

一漏萬伏祈

大人先生俯賜採擇錫之琬琰以登史乘以資泉壤

世世子孫感且不朽謹述

不孝孤哀子趙

熊詔泣血稽顙

賜進士及第

覃恩勅授承德郎翰林院修撰加一級受業王世琛頓

首拜填諱

原缺

刻自治官書小引

大司農趙恭毅公

盛世純臣

清時碩輔勲階屢擢到處而偶烈騰聲敬歷頻經邁
衆而清剛極譽品望久崇於寓內僉云名世間生
德教最著於湖南共曰福星朗照然旆聽旗門之
外者僅能遙揣其大凡惟親承鈴閣之前焉乃克
備知夫衆美祖柱躬列於府史胥徒之末雖未得
侍台光耳聞乎兼綜條貫之才不禁仰追備抱有

如處庶務而不遺鉅細無須郅氏之賓有如當錯
飾而弗憚疑難何待陳琳之草精白之一心獨運
而五官並用吞納僭優公餘之片刻偶乘而百函
自裁咄嗟立就文不加點風雨馳驟於腕中事盡
如神甲兵蘊藏於胸內展經邦之巨畧論功業則
比蹟范韓垂濟世之宏謨觀文章亦並肩賈董允
足稱千秋金鑑孰不仰百代芳型無如磨

巽命於京師跡遠南國緬流風於峴首人痛西州今此
政教之未湮猶存卷軸瞻昔精神之所寄宜付編

磨雖向者刊政錄於上湘未免有掛一漏萬之憾
然襲時傳彙案於兩浙豈足盡登山觀海之奇不
揣下愚欲成大集搜克棟之塵牘日積月累功歷
八年殫鑠院之燕閒按部就班分爲廿卷敢謂鈔
屬吟而爲帙自稱杜甫之小胥然既錄遺編而成
書卽如任輟之故吏覩此而體國經野誠哉治譜
堪傳自斯而鐫棗剡梨惜矣貲囊莫給惟思
名賢之媲美先後同揆而況至治之流芳忠貞素許

伏祈

夔龍接武共成摘槩之資暨夫雨露蒙恩亦塵卦棠
之慕聿成名蹟永著鴻猷謹具下忱敢希

崇鑒

湖南都院從事何祖柱謹述